



OPĆINA TEŠANJ

IZVJEŠTAJ 2016.

OPĆINSKOG NAČELNIKA

za period od 01.01. do 31.12.2016. godine

Broj: 02-49-2-138/17.

Datum: 20.01.2017. godine

SADRŽAJ

UVOD	3
LOKALNA UPRAVA	3
REALIZACIJA STRATEŠKIH DOKUMENATA.....	6
BUDŽET OPĆINE TEŠANJ	6
EKONOMIJA I POSLOVNO OKRUŽENJE	6
EKOLOGIJA I OKOLIŠ.....	9
MLADI	10
KULTURA I NASLIJEĐE	11
POLJOPRIVREDA	11
KOMUNALNA INFRASTRUKTURA I SAOBRAĆAJ.....	12
JAVNA PREDUZEĆA I USTANOVE	12
MJESNE ZAJEDNICE.....	13
NVO.....	13
BORAČKE POPULACIJE	13
PENZIONERI, SOCIJALNA ZAŠTITA.....	14
DOMAĆE I MEĐUNARODNE INSTITUCIJE-SARADNJA SA DRUGIMA.....	15

*John F. Kennedy**"Život u slobodi nije lak, a demokratija nikad nije potpuna."*

UVOD

Općinski načelnik i Općinsko vijeće Tešanj dva su lokalna organa lokalne vlasti i zajednički su odgovorni za funkcioniranje jedinice lokalne samouprave, te pojedinačno odgovornosti za ostvarivanje vlastitih nadležnosti.

Pomenuta odgovornost proizilazi iz izvornih (direktnih) i prenesenih (dodijeljenih) nadležnosti općine. Ove nadležnosti se mogu dijeliti na servisne (pružanje usluga) i regulatorne (utvrđivanje određenih politika, predlaganje i donošenje odluka, planiranje i koordiniranje određenih aktivnosti).

Ostvarivanje općinske politike (kako to Statut navodi) nešto je o čemu Općinski načelnik podnosi izvještaj Općinskom vijeću.

Specifičnost izvještaja za 2016. godinu jeste i to da je rad Općinskog načelnika ocijenjen i kroz izborni proces, direktno od građana sa pravom glasa. Ocjenu/sud o tome su dali građani na „poseban“ način, a Općinsko vijeće koje je preuzelo dužnost polovinom novembra razmatra izvještaj za cijelu godinu. Bez obzira na to, Izvještaj je rađen u cjelovitom obliku sa informacijama na godišnjem nivou iz različitog područja djelovanja. Ovaj izvještaj zapravo sadrži samo dio informacija o tome, a mnogo detaljnije informacije o ostvarenju općinske politike i stanju u određenim oblastima rada i djelovanja sadržane su u brojnim informacijama i izvještajima koje tokom godine razmatra Općinsko vijeće (*Izvještaj o realizaciji kapitalnih projekata, Izvještaji o izvršenju Budžeta, Informacija o realizaciji Strategije općine Tešanj, Informacija/izvještaji o poslovanju javnih ustanova i preduzeća na području općine Tešanj, Informacija o stanju poljoprivrede i realizaciji općinskog poticaja na području općine Tešanj, Informacija o izvršenom deminiranju, trajnom obilježavanju i uklanjanju NUS-a na području općine Tešanj, Informacija o radu mjesnih zajednica, Informacija o radu nevladinih organizacija na općini Tešanj, Informacija o organizovanju i funkcioniranju sistema zaštite i spašavanja i zaštite od požara, Informacija o ostvarivanju prava pripadnika boračkih populacija putem Službe za boračko-invalidsku zaštitu, Informacija o zimskom održavanju lokalnih puteva na području općine Tešanj, Informacija o socijalnoj zaštiti na području općine Tešanj - položaj građana u socijalnoj potrebi i položaj djece i omladine sa posebnim potrebama, Informacija o rješavanju statusa izbjeglih i raseljenih lica na području općine Tešanj*). U svim ovim izvještajima i informacijama sadržane su informacije o ostvarenju općinske politike u različitim oblastima.

LOKALNA UPRAVA

Tokom 2016. godine poslove Općine Tešanj u prosjeku izvršavalo 86 uposlenika i 2 uposlenika u Općinskom pravobranilaštvu. Šest uposlenika je penzionisano, a jednom uposleniku je prestao radni odnos zbog isteka perioda na koji je primljen u radni odnos (dvije godine). U radni odnos su primljena dva nova uposlenika, a u toku postupci za prijem četiri uposlenika. Nastavljena je praksa angažmana volontera za prvo radno iskustvo.

a) Neposredno rukovođenje lokalnom upravom

Realizirano je ukupno 33 sastanka rukovodstva općine na kojima je razmatrano 80 tačaka dnevnog reda. Svi zapisnici su javni i nalaze se na općinskoj web stranici. Općinski načelnik je prema nadležnosti aktivni sudionik administrativnih procesa u općini i odgovoran za izvršenje Budžeta. Time se u stvari veliki dio vremena posveti redovnim poslovima rukovođenja općinskim organom uprave.

b) Servisiranje rada Općinskog vijeća

Općinski načelnik i uprava servisirali su Općinsko vijeće pripremivši materijale za 85 tačaka dnevnog reda (38 tačaka ranije planirane i 47 dodatnih) pripremivši 40 odluka, 7 nacрта odluka, 9 rješenja, 29 izvještaja i informacija. Odgovoreno je na 64 vijećničkih pitanja, te dato mišljenje na 10 inicijativa i 20 amandmana.

c) Administrativne i upravne usluge lokalne uprave

Općina veliki broj administrativnih usluga pruža kroz servisne centre (tzv. šalter sale). Trenutno imamo organizirana 3 servisna centra (Tešanj, Jelah i Tešanjka). U 2016. godini urađeno je 89.622 ovjere dokumenata i ovjere potpisa, iz matičnih evidencija izdato 18.556 uvjerenje (za 2.820 manje u odnosu na 2015. godine, a jedan od razloga je trajnost izvoda iz matičnih knjiga), pored toga izvršeno 21.565 provjera za lične dokumente (CIPS) - uvećano za 4.982 provjere u odnosu na 2015. godine. Za usluge ovjera i izvoda iz evidencija naplaćeno izvršeno je 114.081 usluga, a naplaćen iznos od 119.619 KM. Prema Odluci o taksama izvršeno je usluga u vrijednosti 114.081 KM, koje su oslobođene od plaćanja takse (48% ukupnog iznosa).

Rad lokalne uprave podrazumijeva između ostalog i rješavanje upravnih postupaka a što se može vidjeti u slijedećoj tabeli:

Upisnik prvostepenih predmeta za organ uprave po službama - upravni postupak

Služba	Broj predmeta u 2015	Predmeti iz 2015	Predmeti iz 2016	Broj predmeta u 2016	Broj riješenih predmeta 2015	Broj riješenih predmeta 2016
Služba za društvene djelatnosti i investicije	1058	405	515	1091	653	576
Sl. za finansije i privredu, komunalne i inspeksijske poslove	802	1	1	629	801	628
Sl. za katastar, urbanizam i imovinsko-pravne poslove	2968	309	287	3585	2656	3779
Služba civilne zaštite	842	-	-	828	842	828
Sl. za boračko-invalidsku zaštitu i opću upravu	2336	203	518	2291	2133	1773
UKUPNO:	8006	918	1321	8424	7085	7584

Kao što je iz tabele vidljivo, tokom 2016. godine povećan je obim predmeta u odnosu na 2015. godinu, kao i broj riješenih predmeta. Na kraju 2016. godine bilo je aktivnih predmeta koji su preneseni u 2017. po javnim konkursima za stipendije. Osim toga, kroz djelovodnik predmeta i akata (nepravno rješavanje) evidentirano je **11.034 predmeta**, pri čemu je riješeno 96,17% ukupnih predmeta u 2016. godini. Dakle, ukupan broj predmeta u 2016. godini je **19.458**, pri čemu je riješeno 93,5 %.

d) Sistemi upravljanja kvalitetom i okolišom

U 2016.godinu uspješno su realizovana dva interna audita i jedan vanredni audit na integrisanom sistemu upravljanja kvalitetom i okolišem i to:

1. planirani vanredni audit realizovan je 28.02.2016.godine.
2. prvi planirani interni audit održan je 21.04.2016.godine,
3. drugi planirani interni audit održan je 17.11.2016.godine.

Nadzorni (eksterni) audit po normi ISO 9001-2008 održan je dana 20.12.2016.godine pri čemu je potvrđeno da je sistem upravljanja usklađen sa svim zahtjevima norme ISO 9001-2008, dobro je održavan i kontinuirano se poboljšava. Sistem je potpuno učinkovit i ostvaruje Viziju, Politiku i Ciljeve kvaliteta. Primjetna su poboljšanja implementiranog sistema od recertifikacijskog audita, kao i sposobnost sistema u postizanju poslovnih ciljeva Općine. Nadzorni (eksterni) audit po normi ISO 14001-2004 održan je dana 20.12.2016.godine. Rezultati audita su da je sistem upravljanja usklađen sa svim zahtjevima norme ISO 14001-2004, te da je organizacija uspostavila i održava vlastiti sistem upravljanja u skladu sa zahtjevima standarda, te da je prikazala sposobnost sistema u postizanju organizacijske politike i ciljeva.

e) Edukacija i razvoj ljudskih resursa

Tokom 2016. godine uposlenici Općine Tešanj su prošli 16 internih edukacija realizovanih petkom, a pored ovih edukacija organizovane su dvije cjelodnevne radionice za obuku internih auditora i poslova

kancelarijskog i arhivskog poslovanja. Uposlenici su prisustvovali i na edukacijama koje organizuju domaće i strane organizaciju u zavisnosti od potreba i projekata koji su aktuelni: projektni menadžment, javno-privatno partnerstvo, kreiranje poslovnog ambijenta, promjene propisa o katastru i dr.

f) Modeli, alati i projekti unapređenja

Harmonizacija podataka katastra i zemljišne knjige (gruntnice) - Preuzimanjem podataka iz katastra zemljišta i zemljišne knjige (08.06.2016. godine) otpočela je harmonizacija podataka katastra i zemljišne knjige za katastarske općine: Novo Selo, Tešanjka, Rosulje i Jevadžije. To je druga faza projekta za općinu Tešanj. Poslove harmonizacije izvodi firma Gauss doo iz Tuzle, a završetkom usklađenja podataka zemljišne knjige i katastra slijedi faza uspostave. Izvršen je pregled 3118 prijavnih listova :

- K.O Novo selo 802 prijavna lista - 2166 parcela
- K.O Tešanjka 212 prijavna lista - 353 parcele
- K.O Rosulje 1254 prijavna lista - 3202 parcele
- K.O Jevadžije 850 prijavna lista - 2152 parcele

Ukupan broj pregledanih, potpisanih i ovjerenih prijavnih listova za navedene katastarske općine je: 3118 prijavnih listova -7873 parcela te 3 diobena plana zgrada.

Svrha Harmonizacije je uspostava jedinstvene evidencije podataka katastra zemljišta i zemljišne knjige tj. osiguravaju se pretpostavke za upis prava vlasništva u zemljišne knjige, čime nekretnine dobivaju dodatnu vrijednost, a također se omogućavaju uvjeti za poduzimanje različitih pravnih poslova na njima. Napominjemo da je u prvoj fazi izvršena harmonizacija za tri katastarske općine Tešanj I, Tešanj II i Jelah za ukupno 11300 parcela, a osim ovoga uspostavljeno je etažno vlasništvo u svim stambenim zgradama na području ove tri katastarske općine. Projekat će osim administrativnih olakšica u konačnici doprinijeti manjem broju sudskih postupaka, jednostavnijem dokazivanju vlasništva u privatnim ili poslovnim potrebama, a sve to besplatno za građane. Procijenjena ušteda/efekat za građane je višemilionski.

Adresni registar - U okviru Projektu uspostave Adresnog registra na teritoriji općine Tešanj, a shodno ugovoru koji je zaključen dana 08.06.2015. godine između Općine Tešanj i "CILAP" koji se odnosi na zajedničko finansiranje realizacije "Projekta označavanje ulica i trgova nazivima i zgrada brojevima, te izradu adresnog registra za dio teritorija Općine Tešanj", u 2016. su nastavljene aktivnosti na Projektu i zaključen je ugovor sa odabranim izvođačem u ukupnom iznosu od 68.921,89 KM za postavljanje ukupno 15 000 tabli i pločica.

U finansiranju CILAP je učestvovao sa 30.000,00 KM , a ostatak Općina Tešanj bez učešća građana i pravnih lica. Sa postavljanjem pločica je otpočeto dana 09.03.2016. godine prvo u obuhvatima ulica u naseljenim mjestima Tešanj, Jelah i Tešanjka, a zatim i u 41 naseljenom mjestu općine Tešanj. Do 08.12.2016. godine postavljeno je i evidentirano ukupno 11096 postavljenih adresnih pločica. Uporedo je rađeno na implementaciji i puštanju u rad jedinstvenog softvera Adresni registar. Softver je zvanično pušten u rad dana 22.03.2016. godine tako da su u 2016. godini unijeti podaci o 9501 postavljenih pločica sa pripadajućim opisnim i slikovnim elementima.

Paralelno sa unosom podataka otpočelo je i sa izdavanjem Potvrda o kućnim brojevima za pravna i fizička lica na jedinstvenom obrascu iz softvera, a ova upotpunjena baza u svom punom kapacitetu služiće širem krugu korisnika nakon što se uspostave pravila i principi korištenja iste. Općina Tešanj će biti prva općina u BiH koja će završiti uspostavu adresnog registra na ovom nivou organizacije (označavanje svih objekata , uz elektronsku bazu sa svim potrebnim podacima) za cijeli teritorij općine. Trenutno se vode aktivnosti za preuzimanje svih podataka od relevantnih institucija. Očekujemo završetak projekta u prvom kvartalu 2017. godine, nakon čega ćemo posebno informisati Općinsko vijeće.

Plan integriteta – Općina Tešanj je tokom 2016 godine završila izradu Odluke i Plana integriteta. To je interni antikorupcioni dokument koji sadrži skup mjera pravne i praktične prirode i kojim se sprečavaju i otklanjaju mogućnosti za različite oblike nepravilnosti u radu kao i koruptivnog ponašanja. Plan integriteta predstavlja rezultat samoprocjene podločnosti institucije na koruptivno djelovanje i nepravilnosti. Njegov generalni cilj se ogleda u povećanju transparentnosti i javnosti rada, a time i jačanju povjerenja građana u rad jedinica lokalne samouprave.

Općina je u saradnji sa koordinatorima "Transparency International" Bosna i Hercegovina kao i predstavnicima općina (Šamac, Petrovo i Orašje) pristupila izradi Plana integriteta Općine Tešanj. Aktivnosti radnog tima su rezultirale Prijedlogom Plana integriteta koji je u vidu nacrtu dostavljen Općinskom Načelniku i menadžmentu na uvid i izjašnjenje. Istim Planom je izvršena procjena rizika za sva radna mjesta u organu uprave, te identifikovane mjere na kontroli i smanjenju rizika. Planom su prepoznati ključni rizici ugrožavanja integriteta kao i mjere za unapređenje. Plan integriteta predviđa i Akcioni plan sa tačno utvrđenim: mjerama, aktivnostima, nosiocima aktivnosti, vremenskim okvirom za realizaciju, procjenom troškova, očekivanim rezultatima kao i potencijalnim problemima. Općinski načelnik je svojom Odlukom o usvajanju i provođenju Plana integriteta broj:02-02-1-2108-4/15 od 08.12.2016. godine usvojio Plan integriteta Općine Tešanj. Tokom 2017. godine i dalje provodit će se konkretne mjere koje su identifikovane Planom integriteta.

REALIZACIJA STRATEŠKIH DOKUMENATA

Na početku 2016. godine, iz postojećih strateških dokumenata izdvojeni su projekti za prioritetnu realizaciju u prethodnoj godini, ukupno **27 projekta**. Svaki od projekata/ciljeva je imao svog menadžera, koji je periodično izvještavao o realizaciji planiranog. Vijeće će više o realizaciji strateških dokumenata i stepenu postignuća na dostizanju ciljeva biti informisano kroz **Informaciju** o realizaciji Strategije općine Tešanj u 2016. godini. Osim toga u razvojnom smislu realizirana je Lista kapitalnih projekata za 2016. godinu u iznosu od 1.6 miliona KM, sa 44 projekta. Ukupna ulaganja su veća od 5 miliona KM.

BUDŽET OPĆINE TEŠANJ

Realizacija politika i odluka općine Tešanj se odvijala i kroz blagovremeno pripremljeni i usvojeni Budžet općine Tešanj, te kroz njegovu dosljednu i stabilnu realizaciju. Svi budžetski dokumenti (nacrt, prijedlog, kvartalni, polugodišnji i godišnji izvještaji) su blagovremeno pripremljeni, predloženi i usvojeni!

Kroz budžet su realizovane ili započete aktivnosti vrijednosti oko 15 miliona KM, a njegovom realizacijom je obezbijeđeno funkcionisanje organa uprave, zadovoljenje općedruštvenih potreba, zadovoljenje socijalnih potreba, sufinansiranje javnih ustanova, nevladinog sektora, poticaja privredi, studentskih stipendija, te respektabilna kapitalna ulaganja. Direktni općinski prihodi su povećani za oko 20%, pri čemu materijalni rashodi organa uprave umanjeni za 3,8 %. Grantovi po raznim osnovama, kojim se sredstva vraćaju u privredu i društvene tokove, su dostigla nivo od 3,8 miliona KM. Budžet, DOB i izvještaji o izvršenju budžeta se nalaze na općinskoj web stranici.

Na blagajni (uključujući i pomoćne blagajne) bilo je **11.272 naplata** i naplaćeno je 870.923,05 KM, isplata je bilo 1.017 i isplaćeno je 870.077,60 KM. Provedeno je 3.926 naplata katastra po federalnom propisu i naplaćeno 48.909,00 KM te polagano na račun korisnika.

Općina Tešanj je u 2016. godini vršila nabavku radova, roba i usluga u skladu sa postupkom propisanim Zakonom o javnim nabavka Bosne i Hercegovine ("Službeni glasnik BiH", broj: 39/14). Provedeno je ukupno **177 postupaka** sa potpisanim ugovorima (dakle procedura dovedena do realizacije), a za provedene postupke potpisano je ugovora **u vrijednosti od 6.770.697,45 KM**. Provedeni su postupci na način da je služba imala samo dvije žalbe koje su riješene u korist Općine Tešanj.

EKONOMIJA I POSLOVNO OKRUŽENJE

Ekonomski pokazatelji govore da je ekonomija općine Tešanj imala rast i u 2016 godini. Rast je prisutan u pogledu broja zaposlenih i smanjenju broja nezaposlenih. Atraktivnost općine u pogledu poslovnog ambijenta, rada već dokazanih privrednih subjekata, kao i mogućnosti i pogodnosti koje u tom pogledu

postoje, već je prepoznata u okruženju, kod domaćih i međunarodnih investitora i domaćih i međunarodnih institucija i organizacija.

Na području Općine posluje 2.242 poslovnih subjekata, i to: 896 pravnih lica, 471 poslovnih jedinica u sastavu pravnih lica i 875 poslovnih subjekata u oblasti male privrede (razlika u odnosu na 2015. godinu je u objavama pasivnih neaktivnih fizičkih lica po sili zakona). Od ukupno evidentiranih poslovnih subjekata tokom 2016. godine registrovano je 141 u oblasti male privrede (trgovina-19, obrt-100, ugostiteljstvo-13, prijevoz-9).

Prosječan broj poslovnih subjekata na 1000 stanovnika je 48,85, što je iznad prosjeka Zeničko-dobojskog kantona.

Prema podacima iz januara 2017., oktobar 2016

godine, **broj zaposlenih** na području općine Tešanj je iznosio 11434 lice¹ (**10.997 lica** - zvanični podaci za kraj 2015). Ovo je povećanje za 437 zaposlena u prvih deset mjeseci 2016. godine, dok to povećanje gledajući u odnosu na 1991. godinu (6978 zaposlenih na području općine) iznosi čak 4.452 više zaposlenih nego 1991. godine. Ovo je povećanje od 20,3% u odnosu na 2012 i 55,2% u odnosu na 1991. godinu.



S druge strane, broj nezaposlenih pada i prema posljednjih podacima od 31.12.2016. godine iznosio je 6995 (31.12.2015. bilo je 7.382 nezaposlenih osoba)². To je 367 manje nezaposlenih u odnosu na 31.12.2015. godine. Procentualno izraženo, to je **5,25 % manje nezaposlenih** tokom 2016. godine.

Ovo je najniži broj nezaposlenih u posljednjih sedam godina. U odnosu na decembar 2012. godine nezaposlenih je manje za 14,03 %, među njima nezaposlenih demobilisanih vojnih obveznika 680 ili 30,1 %. Unutar Zeničko-dobojskog kantona Tešanj ima najmanji procenat nezaposlenih, svejedno što je učešće radne snage (zaposleni+nezaposleni) u odnosu na popisani broj stanovnika najveći u ZDK. Rang razvijenosti FBiH po općinama 2015. godine mjeren osnovnim ekonomskim pokazateljima stepenom zaposlenosti, nezaposlenosti, GDP po glavi stanovnika, broju učenika u osnovnim i srednjim školama na 1000 stanovnika itd, svrstava Općinu Tešanj na **7. mjesto** razvijenosti u FBiH među 79 općina i gradova (2007. -35. mjesto, 2011. i 2012. -11. mjesto, 2013. -10. mjesto)³.

Nažalost, politika raspodjele poreskih sredstava u BiH i FBiH prikupljenih po različitim osnovama (PDV, porez na dohodak, porez na dobit i dr.) ne uzima u dovoljnoj mjeri u obzir mjesto proizvodnje, prometa i sl., tako da se ovi pozitivni ekonomski efekti prenose više indirektno.

Jedan od uslova za stabilan i konstantan lokalni ekonomski rast svakako je i povoljno poslovno okruženje. Općina Tešanj konstantno ulaže budžetska sredstva za unapređenje poslovne infrastrukture i poboljšanje uslova za poslovanje. Povoljni uslovi za poslovanje se ogledaju u obezbijeđenoj poslovnoj infrastrukturi i uslovima poslovanja kao i efikasnoj općinskoj administraciji koja je posvećena i na usluzi poslovnim sektorima.

a) Općina Tešanj u namjeri jačanja komunikacije javnog i privatnog sektora formirala je Savjet za



¹ Mjesečni statistički pregled po kantonima 12/2016- Federalni zavod za statistiku – 06.01.2017.

² Podatak Zavoda za zapošljavanje odjel Tešanj za 31.12.2016. i 31.12.2015. godinu

³ Federalni zavod za programiranje razvoja – Socioekonomski pokazatelji po općinama u FBiH u 2015.

lokalni ekonomski razvoj (SLER), koji svojim radom pomaže institucionalnom dijalogu javnog i privatnog sektora i poboljšanju ekonomskog razvoja.

b) Općina Tešanj je na nivou najnižih taksi i naknada koje su prihod općine.

c) **Poslovna infrastruktura –**

- U poslovnoj zoni Bukva realizirana je izgradnja VI faze treće trake u dužini od 395 m, vrijednosti 199.422,16 KM. Projekat je okončan iz sredstava Federalnog ministarstva razvoja, poduzetništva i obrta i uz podršku budžeta Općine Tešanj (50.000 KM). Izgradnja III trake počela 2010 godine i završena 2016 godine. Ukupno je urađeno 2.357 m III trake. Ukupna investicija iznosi 1.229.097,38 KM (ZDK 488.451,50 KM, Federalno ministarstvo razvoja, poduzetništva i obrta-sa UNDP i Švicarska 400.000,00 KM i Općina Tešanj 340.645,88 KM).
- Nakon uspješno realiziranih projekta izgradnje treće trake kroz industrijsku zonu Bukva koji u cjelosti, uz podršku sredstava budžeta Općine Tešanj, realiziran sredstvima Vlade Federacije i Evropske unije, putem Projekta lokalnog integriranog razvoja koji provodi UNDP, Općina Tešanj je u nastavku aktivnosti na uređenju poslovnih zona na području Općine, 2016. godine ponovo aplicirala za korištenje sredstava po Javnom natječaju za odabir korisnika Grant sheme "Unapređenje poduzetničkih zona u Federaciji BiH za 2016. godinu". U 2016 godini na javni poziv kandidiran je projekat izgradnje javne rasvjete u poslovnoj zoni Bukva. Sredstva su odobrena u iznosu od 136.000,00 KM uz podršku budžeta Općine Tešanj od 50.000,00 KM, pa je ukupna vrijednost projekta 186.000,00 KM. Javna nabavka je provedena, ugovor potpisan sa najpovoljnijim ponuđačem, izvođač je uveden u posao, a završetak posla trenutno zavisi od vremenskih uslova. Projektom je predviđeno postavljanje LED rasvjete.
- Tokom godine općina je brzo reagovala na zahtjeve za izmjene regulacionih planova prema potrebama poslovnih subjekata (Glinište, Bukva, JZ Tešanj, Kiseljak), kako bi se omogućio ubrzan razvoj poslovnih subjekata.
- U toku 2016. godine izvršena je potpuna eksproprijacija na planiranoj trasi III faze projekta u obuhvatu RP "Glinište", u svim podnesenim prijedlozima kod nadležne Službe za katastar, urbanizam i imovinsko-pravne poslove. Ukupna dužina III faze projekta iznosila je 445 m² i podrazumijevala je rješavanje imovinsko-pravnih odnosa sa 5 vlasnika zemljišta (Kantić, Alagić, Kerlić, Smailbegović i Čehajić). Ukupna površina eksproprijisanog zemljišta na III fazi iznosi 8541 m². Ovim su izvršene pripremne aktivnosti kako bi se u 2017. godini pristupilo prosijecanju i formiranju nove saobraćajnice. Već su kandidovani i određeni projekti kako bi se obezbijedila sredstva za gradnju nove saobraćajnice.
- Kandidovan je projekat, obezbijeđena su sredstva i izvršeno je projektovanje saobraćajnica u proširenom dijelu poslovne zone Bukva (u skladu sa novim regulacionim planom koji je predvidio ova proširenja lokacija za investiranje). Tokom 2017. godine općina je u planu gradnju novih saobraćajnica kandidovati na različite adrese.
- U Ljetiniću na prostoru na kojem se već grade poslovni objekti izvršeno projektovanje prostora kako bi se dugoročnije planirao raspored parcela i uređenje površina. Aktivnost vođenja u saradnji sa poslovnim subjektima.

d) **Saradnja** sa Udruženjem privrednika i privrednicima, zanatlijama i potencijalnim investitorima ostvarivala se u duhu otvorene i neposredne saradnje. Održavani su tematski sastanci, a Općinski načelnik je tokom godine posjećivao poslovne subjekte u različitim prilikama (planiranje investicija, poslovni rezultati i dr.). Općina je bila snažna (finansijski i na druge načine) podrška realizaciji sajma privrede.

e) **BFC SEE – BUSSINES FRIENDLY CERTIFIKATE**

Općini Tešanj je u 2016. godini uručen BFC sertifikat, koji nije jednokratna nagrada nego rezultat učešća u regionalnom programu Certifikacija općina i gradova sa povoljnim poslovnim okruženjem u jugoistočnoj Evropi (BFC SEE). Ovim je ostvaren regionalni rang **konkurentnosti** i kvaliteta usluga koji općina pruža investitorima i privrednicima za unapređenje poslovanja, kao i prilika da se učestvuje u regionalnoj razmjeni najboljih praksi. Ispunjen je niz kriterija, od strateškog planiranja i realizacije strategije, dijaloga javnog i privatnog sektora, razvoja elektronske uprave, upravljanja budžetom, brzine i kvaliteta administrativnih usluga itd.

EKOLOGIJA I OKOLIŠ

Otpadne vode – Tokom 2016. godine u segmentu zbrinjavanja otpadnih voda odvijale su se brojne i vrlo dinamične aktivnosti. Projekat izgradnje novog sistema prikupljanja, odvodnje i prečišćavanja otpadnih voda je ušao u fazu u kojoj su izvođeni građevinski radovi. Kratak pregled glavnih aktivnosti koje su realizirane tokom godine:

- *Početkom 2016. godine okončana je faza iz prethodne godine (Tešanj-Novo Selo) u finansijskom i drugim poslovima.*
- Intenzivno je rađeno na obezbjeđenju potrebnih dozvola za radove na narednoj fazi. Naročito je to bilo izraženo sa preduzećem Ceste FBiH (nekadašnja Direkcija cesta FBiH) zbog prolaska kolektora blizinom magistralnog puta. Bila su potrebna određena preprojektovanja i sl.
- Provedena je javna nabavka i ugovorena druga faza radova na dionicama Mračaj-Žabljak i Tešanjka-Kraševo u dužini od oko 7 km. Vrijednost ugovorenih radova je cca 2,7 miliona KM – bez PDV-a, a do kraja 2016. godine realizirano je oko 75% ugovorenih radova.
- Rađeno je na pripremi glavnog projekta sekundarne, tercijarne mreže i kućnih priključaka. Do sada je u potpunosti projektovano oko 110 km te mreže, ostatak posla očekujemo da će biti završen u 2017. godini.
- Pripremljen je projektni zadatak i u toku je priprema tendera za izradu idejnog projekta uređaja za tretman otpadnih voda.
- Vođenje su aktivnosti na pripremi dionica III (Žabljak-Tešanjka i Novo selo Tešanjka), IV (dionica u Jelah polju i V (dionica Glinište) za postupak javne nabavke. U procesu je izdavanje potrebnih dozvola, što je s obzirom na veličinu projekta složena aktivnost (saglasnosti vlasnika, vlasnika instalacija, agencija, direkcija, ministarstava itd.). U podmakloj fazi je dozvola za fazu III.
- Kandidovani projekti za grant-neporatna sredstva kod Fonda za zaštitu okoliša. U okviru toga potpisan jedan ugovor za 300.000 KM.

Svaka od ovih pojedinačnih aktivnosti je shodno obimu projekta, ali i kompleksnosti izgradnje kanalizacionog sistema (od projektovanja do izvođenja) i načinu vođenja (uključenost brojnih institucija u FBiH i EU), svojevrsna je cjelina i predstavlja značajan posao. Aktivnosti na projektu se nastavljaju i u 2017. godini.

Vodosnabdijevanje – Razvoj novih vodovodnih sistema je redovna aktivnost općine Tešanj. U 2016. godini realizovano je slijedeće:

- Ugovorena i većim dijelom realizovana sredstva vodnih naknada i učešća građana na vodovodu Medakovo-Trepče (cca 315.000 KM). Do kraja 2016. godine izvršeno oko 75% ugovorenih radova.
- Realizovana gradnja pumpne stanice vodovod Tepe-Hrvatinići,
- Ugovoreni i većim dijelom realizovani radovi na izgradnji rezervoara 300 m³ za vodovod Raduša. Realizacija otežava zbog imovinskih odnosa i otkupa zemlje.
- Ugovorena 1 faza izgradnje novog bunara PEB 1, vrijednost cca 200.000 KM. Složen postupak do građevinske dozvole zbog vlasničkih odnosa.
- Usvojena Odluka o zaštitnim zonama i zaštitnim mjerama za izvorište "Tešanjki kisjeljak".
- Razmatran zahtjev za donošenje nove odluke o zaštitnim zonama Bunara DC – odlučeno da se zahtjev odbije.
- Učešće u donošenju Odluke ZDK o zonama sanitarne zaštite izvorišta Jelah, odluka usvojena, učešće u donošenju Odluke ZDK o zonama sanitarne zaštite bunara Miljanovci.

Upravljanje otpadom –

Aktivno je proveden projekat skupljanja i zbrinjavanja PET ambalaže u kojem učestvuju UG Eko mladi, KP Rad, sve osnovne i srednje škole općine Tešanj. Osim toga potpisan je Sporazum o zajedničkom djelovanju na skupljanju elektronskog otpada.

Tokom 2016. godine rađeno je na izradi projektne dokumentacije za zatvaranje i sanaciju deponije. Posao je završen u nivou od 90% planiranog. Do konačnog prihvatanja preostalo je usaglašavanje vremenskih planova i finansijske konstrukcije.

Putem javnog poziva općina Tešanj je za 2016. godinu kod Federalnog ministarstva okoliša i turizma obezbijedila sredstva cca 70.000 KM za realizaciju projekta koji treba doprinijeti proširenju obuhvata odvoza

otpada kroz nabavku kanti za smeće, prese za otpad i kompostera. Sporazum je potpisan i projekat je u fazi realizacije.

Prirodna nesreća 2014 posljedice i prevencija – Nakon prirodne nesreće koja je 2014. godine pogodila područje općine Tešanj, i u 2016. godini se nastavilo sa sistemskim pristupom sanacije nastalih posljedica, kako na društvenoj infrastrukturi, tako i na privatnim objektima. Kroz dva javna poziva za dodjelu sredstava od kojih se prvi odnosio na sanaciju, a drugi za izgradnju stambenih objekata dodijeljeno je 66.360 KM, od čega 30.660 KM za sanaciju stambenih objekata, a 35.700 KM na izgradnju jednog stambenog objekta. Sredstva su osigurana od strane Federalnog štaba civilne zaštite u iznosu od 85.000 KM.

U 2016. godini kontinuirano je vršeno praćenje stanja na 286 klizišta. Urađeni su prioriteti sanacije za 2016. godinu. Sredstva za sanaciju klizišta osigurana su u Budžetu Kantona u iznosu od 125.000 KM i u Budžetu Općine u iznosu od 75.000 KM iz namjenskih sredstava sa stavke preventivnih mjera zaštite i spašavanja. Izvršena je **sanacija 22 klizišta** u ukupnom iznosu od 136.540 KM.

Provođenje preventivnih mjera zaštite od poplava tokom 2016. godine realizovano je u skladu sa Planom mjera zaštite od poplava. Aktivnosti su vođene u MZ Rosulje, MZ Medakovo, MZ Tešanjka, MZ Jelah i Dobropolje-Mekiš na čišćenju, produbljavanju i uređenju vodotoka, te izgradnju obaloutvrda na mjestima koja predstavljaju prijetnju dalje erozije obala i zemljišta. Ukupno je očišćeno 780 metara vodotoka i uređeno 70 metara obaloutvrda, te su na rijeci Usori izgrađene obaloutvrda na dvije lokacije u dužini od 200 m (finansirano do strane Agencije za vodno područje rijeke Save). Za realizaciju navedenih aktivnosti utrošeno je 23.306,40 KM sredstava posebne naknade za preventivne mjere zaštite i spašavanja, a na rijeci Usori 69.639,98 KM.

Okoliš - Tokom 2016. godine kontinuirano je nastavljeno mjerenje zagađenosti zraka na području općine Tešanj. Mjerenje je izvršeno na području MZ Jelah u periodu od 30.06. do 25.08.2016.godine, kojim je utvrđeno da nema prekoračenja graničnih vrijednosti polutanata. Ova aktivnost se provodi od 2011. godine sa Metalurškim institutom "Kemal Kapetanović" Zenica.

<i>Vrsta mjerenja</i>	<i>Godina</i>	<i>Lokacija</i>
<i>Zrak</i>	<i>2011</i>	<i>Bukva</i>
	<i>2012</i>	<i>Bukva</i>
	<i>2013</i>	<i>Tešanj (JP "Rad")</i>
	<i>2015</i>	<i>Miljanovci</i>
	<i>2016</i>	<i>Jelah</i>

MLADI

Mladi su imali različite oblike podrške i u 2016. godini:

Stipendije svima je aktivnost koja je nastavljena i u 2016. godini. Na Konkurs za dodjelu općinske stipendije u 2015/2016. godini bilo je ukupno 460 prijava, a nakon provedenog postupka imenovane komisije, broj zaključenih ugovora općine o stipendiranju studenata u 2016. godini je **409**. Općina je pravovremeno isplatila sve stipendije, te objavila javni poziv za akademsku 2016/2017 godinu. Proces je u toku, a prijavljeno je **417** kandidata.

Podržavali smo predškolski odgoj novčanim podsticajima, a osnovne i srednje škole kroz podršku u materijalnom obezbjeđenju osnovnih potreba. Svim „prvačicima“ (**560**) na početku školske godine obezbijeđen je poklon paket u školskom priboru. Općina je finansirala sva školska takmičenja u znanju (matematika, fizika, engleski jezik, vjeronauka) i sportu (nogomet, košarka, rukomet, odbojka). Krajem nastavne godine organiziran je prijem za **73** najbolja učenika. Tešanj je uključen u projekat Sportske igre mladih.

Od projekata koji se odnose na mlade realizovano je sedam projekata neformalnih grupa kroz Omladinsku banku Tešanj. Ukupna vrijednost projekata je 32.000 KM, od čega je Općina Tešanj učestvovala sa 12.500

KM. Projekti su realizovani u mjesnim zajednicama Mrkotić, Dobropolje-Mekiš, Trepče, Jelah, Karadaglije, Tešanj i Piljužići.

Podrška poduzetnim mladim ljudima je nastavljena šestu godinu, te je kroz javni poziv podržano 9 mladih da pokrenu vlastiti biznis, i to kroz registraciju poslovnih aktivnosti, doprinose u prvoj godini poslovanja, zakup prostora u prve tri godine poslovanja, a iznos podrške Općine Tešanj je 46.000 KM. Općina Tešanj je ovim pristupom kroz šest godina (2010-2016) direktno podržala registraciju 38 poslovnih subjekata i zapošljavanje 46 mladih ljudi, te indirektno zapošljavanje još 20, što je ukupno 66 novih radnih mjesta. Od 38 poslovnih subjekata 34 i dalje uspješno rade i posluju.

KULTURA I NASLIJEĐE

Područje kulture će biti tretirano kroz izvještaje triju javnih ustanova koje djeluju u području kulture i informaciju o radu udruženja građana i Općinsko vijeće će imati priliku da analizira ovo područje. Nastavljeno je kontinuirano djelovanje, uz neke rezultate koji 2016-tu godinu čine izuzetno uspješnom u ovoj oblasti. Treba naglasiti da su u prethodnoj godini organizirane 3 općinske kulturne manifestacije kojima su obilježeni značajni datumi za općinu Tešanj (utvrđeni Statutom općine), te da je općina podupirala i druge javne i kulturne sadržaje koje su organizirala udruženja građana ili mjesne zajednice. U općinskim manifestacijama organizirano je **10** koncerata, **13** izložbi, **2** pozorišne predstave, **20** promocija, tribina, okruglih stolova, naučnih skupova, **3** turnira...

Odlukom o obilježavanju značajnih datuma za općinu Tešanj definisane su aktivnosti koje su provođene i u 2016. godini putem mjesnih zajednica, udruženja i ustanova. Treba reći da su prigodno obilježeni državni praznici, općinski značajni datumi (4. april, 9. septembar i 10. decembar), te drugi značajni datumi (godišnjice formiranja jedinica, brigada i drugih manjih jedinica i sl.), te su u okviru toga vršeno uređenje i nekih od lokacija (Crni Vrh, Hrastik, Vis, Bučje...) a sve u skladu sa Programom obilježavanja tekovina odbrane 1992-1995.godine. Sadržaji koji su bili otvorenog karaktera imali su značajnu posjetu.

POLJOPRIVREDA

Na području naše općine, zastupljeni su različiti vidovi poljoprivredne proizvodnje, a u stočarskoj proizvodnji i dalje je najrazvijenije govedarstvo odnosno proizvodnja mlijeka kojom se bavi najveći broj gazdinstava. Otkup mlijeka od proizvođača vrši pet otkuplivača/prerađivača mlijeka a oko 900 gazdinstava ima sklopljen ugovor o otkupu mlijeka. Uz proizvodnju mlijeka prisutni su i razvijaju se i drugi vidovi poljoprivredne proizvodnje kao što je proizvodnja mesa brojlera, proizvodnja voća, povrća i dr. Treba istaći da općina Tešanj od 2006. godine izdvaja budžetska sredstva za razvoj poljoprivrede i daje značajnu podršku poljoprivrednoj proizvodnji, i do sada je utrošeno oko 2.900.000. KM na novčane poticaje poljoprivredi. U 2016.godini zaprimljeno je 689 zahtjeva za poticaj poljoprivrednoj proizvodnji, od toga 450 zahtjeva za animalnu i 239 zahtjeva za biljnu proizvodnju (29 nije ispunilo kriterije). U oblasti animalne proizvodnje za 343 gazdinstva odobren je poticaj proizvodnji mlijeka, za 44 poticaj pčelarstvu i za 43 poticaj za tov junadi. U oblasti biljne proizvodnje za 106 gazdinstava odobren je poticaj proizvodnji povrća za otkup, za 49 proizvodnji u plastenicima, 45 proizvodnji voća za otkup i za 30 gazdinstava poticaj proizvodnji povrća i ljekobilja na otvorenom. Ukupno za 2016. godinu za 607 korisnika isplaćeno je **326.104,60 KM** o čemu će Vijeće kao i o stanju u poljoprivredi biti upoznato kroz Informaciju o stanju u poljoprivredi i realizaciji općinskih poticaja u 2016. godini. Osim novčanih poticaja primarnoj poljoprivrednoj proizvodnji a shodno Programu, cca 5% sredstava se utroši na aktivnosti koje su od značaja za razvoj poljoprivrede kao što su izbor NAI poljoprivrednog gazdinstva, edukacije, radio i tv emisije o poljoprivredi, učešće na sajmovima i dr.

Sva fizička i pravna lica koja žele aplicirati na poticaj moraju se upisati u Registar poljoprivrednih gazdinstava i Registar klijenata, odnosno već upisani ažurirati podatke u Registru koji vodi općinska služba nadležna za poslove poljoprivrede, tako da je do sada u Registar upisano **1780 gazdinstava**, a 789 ih je u 2016 ažuriralo podatke.

KOMUNALNA INFRASTRUKTURA I SAOBRAĆAJ

Saobraćajna infrastruktura

Na prostoru općine ukupno je **479 kilometara cesta različitih kategorija**. U općinskoj nadležnosti bilo je ljetno i zimsko održavanje na lokalnim i nekategorisanim cestama. Ukupno je održavano **231 km asfaltnih i 197 km makadamskih cesta**. O gradnji i uređenju saobraćajne infrastrukture biće riječi u Izvještaju o realizaciji Liste kapitalnih ulaganja za 2016. godinu.

Javna rasvjeta

Javna rasvjeta je komunalni objekat koji služi za zadovoljenje potreba građana. *Odlukom o javnoj rasvjeti* mjesne zajednice finansiraju izgradnju i funkcionisanje ulične rasvjete dok troškovi potrošnje električne energije u cjelosti padaju na teret budžeta. Održavanje javne rasvjete područja obuhvaćenih regulacionim planom (obveznici plaćanja rente) u nadležnosti je ugovornog preduzeća (shodno raspoloživim sredstvima) a ostala područja pripadaju organima mjesnih zajednica.

Do proširenja je došlo u mjesnim zajednicama Tešanj-Hrvatinići, Šije-Donje polje, Jablanica i Piljužići, a nova brojila su u Rosuljama, Dobropolju i Bukva-Logobare, sa potporom Općine u plaćanju priključka. Na području Općine imamo **68** mjernih mjesta ulične rasvjete u 21 mjesnoj zajednici sa utroškom u 2016. godini od cca **177.500 KM**. Ukupan broj svjetiljki sada je 3.744 i veći je za novih 574 u protekloj godini ili za oko 15%. Zadnjih nekoliko godina vršene su uštede ugradnjom štednih sijalica a sve nove rasvjete se već rade sa štednim sijalicama. Iako je bilo proširenja u navedenim MZ i 4 nova brojila javne rasvjete razlika u ukupnoj potrošnji je neznatna **(+1,1%)** kako zbog ugradnje štednih sijalica tako i stalnog podešavanja vremena rada javne rasvjete provjerom senzora na brojilima.

Komunalna higijena i uređenje javnih površina

Program komunalne higijene najvećim dijelom se realizuje kroz godišnji ugovor sa JP "RAD" Tešanj. Vršeno je svakodnevno održavanje ulica, javnih i zelenih površina na području Tešnja, Jelaha i Tešanjke. Također vršena je dekoracija ovih urbanih naselja u vrijeme značajnih datuma, znavljanje i dopuna korpi za smeće, čišćenje snijega s trotoara u zimskom period, postavljanje novih **50** parkovskih klupa i dr. Javne površine koje nisu obuhvaćene Ugovorom, uređenje i održavanje je rađeno uz angažovanje lica sa zavoda za zapošljavanje. Provedeno je više akcija na čišćenju putnih pojasa te obala rijeke Tešanjke od niskog rastinja i smeća. Kroz programe proljetnog i jesenskog uređenja, zasađene su sve planirane javne površine i žardinjere sa cvijećem, urađeno farbanje i popravak klupa, drvenih žardinjera, betonskih vazni i žardinjera, javnih česmi. Zasad površina rađen je uz angažovanje učenika po sporazumu sa Poljoprivrednom školom.

Prikupljanje i odvoz kućnog smeća je poboljšano kroz proširenje obuhvata za **413** novih korisnika čime se gase ili smanjuje smeće na divljim deponijama. Povećan je i broj lokalnih sistema odvodnje otpadnih vode te broj priključaka na javnu kanalizacionu mrežu. Uzimani se uzorci javnih voda/česmi radi analiza kvartalno, te po potrebi intervenisano sa klorom i čišćenjem spremnika.

Na području općine završeno je u prošloj godini postavljanje još **šest** novih autobusnih stajališta (Lepenica-Drum, Šije-Bor, Rosulje-M4, Raduša-Dom, Medakovo-Škola, Mekiš-R474) i do sada je ukupno postavljeno **57** uz magistralne, regionalne i lokalne ceste.

U 2016. godini ukupno je izvršeno čišćenje na **28 lokacija** u 12 mjesnih zajednica (115 m³). Na osnovu plana uklanjanja divljih deponija na području Općine, u I fazi izvršeno je čišćenje 42m³ na 16 lokacija u 7 mjesnih zajednica (Jelah, Karadaglije, Piljužići, Novi Miljanovaci, Kalošević, Šije i Jablanica) dok je u jesenjoj fazi očišćeno još 73m³ na 12 lokacija u 7 mjesnih zajednica (Jelah, Kalošević, Medakovo, Bobare, Trepče, Ljetinić i Rosulje).

JAVNA PREDUZEĆA I USTANOVE

Općina je osnivač 8 javnih ustanova i 3 javna preduzeća. Općinski načelnik imao je putem nadležnih službi ili direktno saradnju sa Nadzornim i Upravnim odborima. Svaka javna ustanova i preduzeće imalo usaglašene godišnje ciljeve rada. Javne ustanove i preduzeća su dostavljale kopije zapisnika sa **76** sjednice upravnih

(javne ustanove) i **20** sjednica nadzornih odbora (JP Rad-8, JP Toplana-8 i JP TRA-4). O radu javnih ustanova i preduzeća Vijeće će se detaljno informisati putem Informacije o radu javnih ustanova i Izvještaja preduzeća.

MJESNE ZAJEDNICE

Organi mjesnih zajednica tokom 2016. godine, pored obavljanja redovnih aktivnosti za koje su birani (pružanje usluga građanima, prepoznavane, iniciranje, kandidovanje i praćenje realizacije kapitalnih projekata, provođenje projekata u sopstvenoj režiji, prikupljanje sredstava, itd) uložili znatne napore na realizaciji projekata u vlastitoj režiji, npr. projekata javne rasvjete (Jablanica, Mrkotić, Džemilić Planje, Trepče, Orašje Planje, Kraševo...), kao i doprinos realizaciji važnih projekata koje su zajednički vodili Općina Tešanj i mjesne zajednice.

MZ su radile u okviru svojih ovlaštenja te održale **194 sjednica savjeta** MZ (od toga 18 konstituirajućih) ili u prosjeku 7,76 sjednica Savjeta po MZ i **46 sjednica skupštine** (od toga 19 konstituirajućih) ili u prosjeku 1,84 sjednice po MZ-ci, sa ukupno donesenih **1294⁴** odluka i zaključaka (936 odluka i 358 zaključaka) koji su redovno dostavljani općini na uvid. Ukupno **517** članova organa MZ-aktivista bili su inicijatori i podrška brojnih aktivnosti. Ako dodamo aktiviste koji su uključeni u aktivnosti kroz građevinske odbore za realizaciju projekata te organizacione odbore i radne timove za pripreme i organizaciju manifestacija u MZ dolazimo do brojke od preko 1000 aktivista u 25 MZ.

Općinski načelnik sa saradnicima tokom godine je organizovao **30** sastanaka sa predstavnicima 19 mjesnih zajednica, po različitim temama. Općinski načelnik je organizovao i tematski sastanak sa svim predsjednicima savjeta koji se odnosio na realizaciju kapitalnih projekata u MZ na kojem su se predsjednici izjašnjavali o spremnosti projekta i u kojem periodu će se realizovati, ovo se pokazalo kao dobra praksa. Viši referent za rad sa MZ je, na poziv mjesnih zajednica, prisustvovao na **21** sastanku organa MZ u 17 mjesnih zajednica, te na **jednom** zboru građana (Kraševo). U sklopu projekta „Jačanja uloga MZ u BiH“ Viši referent za rad sa mjesnim zajednicama je prisustvovao na **19** sastanaka sa organima MZ i građanima u cilju kandidovanja projekata kao i **4** sastanka monitoringa. Realizovano je 15 tema edukacije sekretara i predsjednika savjeta MZ. Informacija o radu mjesnih zajednica za 2016. godinu (nakon završnih računa) će sadržavati detaljniji pregled rada mjesnih zajednica.

NVO

Općina je putem javnog poziva finansirala **67 projekata za ukupno 47 udruženja građana** (kultura 14, sport 34, ostali 19) u 2016. godini. Osim toga općina Tešanj je za udruženja od posebnog interesa (definisana Odlukom Općinskog vijeća) obezbijedila podršku u njihovom radu. O tome će Općinsko vijeće posebno biti informisano kroz Informaciju o radu udruženja građana, na jednoj od narednih sjednica.

Realizovani su neki značajniji sadržaji poput: podrška u organizaciji Sportskih igara mladih, izbora sportiste godine, brojnih pojedinačnih sportskih turnira, izložbe sitnih životinja, te brojni projekti u kulturi, ekologiji i drugim područjima. Udruženja su doprinosila ukupnom kvalitetu življenja djelujući u različitim oblastima rada, od humanitarnog (građenja stambenih objekata, podrške građanima u stanju socijalne potrebe), do sportskog (redovna ligaška takmičenja, kupovi, turniri...), kulturnog ili drugog (različiti javni događaji). Saradnja u 2016. godini se odvijala na visokom nivou i nije bilo problema.

BORAČKE POPULACIJE

Općine nema izvornih nadležnosti kada je u pitanju ostvarivanje prava boračkih populacija već samo prenesene nadležnosti/obaveze te se po osnovu ovlaštenja i obaveza propisanih odredbama člana 38. Zakona o pravima branilaca i članova njihovih porodica (Sl. Novine Federacije BiH broj:33/04, 56/05, 70/07 i 9/10) po službenoj dužnosti ili po zahtjevu stranke radi na donošenju prvostepenih rješenja u predmetima priznanja prava na porodičnu i ličnu invalidninu i ortopedsko pomagalo (RVI i porodice šehida i poginulih boraca). Služba vrši redovni mjesečni obračun invalidnina za cca. **1250 korisnika** porodične i lične invalidnine

⁴ Podaci o broju Odluka i zaključaka korišteni iz dostavljenih zapisnika o održanim sjednicama, neki nisu precizno definisani pa je moglo doći do manjih grešaka u određivanju tačnog broja.

i isti dostavlja Kantonalnom i Federalnom ministarstvu za pitanja boraca i invalida odbrambeno-oslobodilačkog rata. Na ovaj način je za korisnike porodične i lične invalidnine općine Tešanj za 2016. godinu realizovano **ukupno 3.855.494,65 KM**. U 2016. godini je izdato i **1168** uvjerenja iz službenih evidencija.

Kada su u pitanju dopunska prava korisnika po kantonalnim propisima situacija se značajno popravila te nema značajnih neizmirenih obaveza prema korisnicima a što u ranijem periodu nije bio slučaj. Ove godine je pokrenut projekat zapošljavanja i samozapošljavanja boračkih populacija što je realizovano putem javnog poziva. Sve navedeno je vidljivo u slijedećoj tabeli:

Broj podnesenih zahtjeva za dopunska prava za 2016.godinu putem službe općine Tešanj								
Naziv postupka	Broj zahtjeva	Uvaženo zahtjeva	Odbijeno zahtjeva	Neriješeno zahtjeva	Odobrena sredstva u 2016.	Dugovanj a iz 2015. i ranije	Isplaćeno u 2016. godini	Obaveze iz 2016.
JNP putem org.uprave (općinska sredstva)	421	391	20	10	50.000	-	51.124	-
Dodjela prehrambenog paketa (općinska sredstva)	141	141	0	0	15.000	-	14.945	-
Vanredna novčana	293	283	10	-	88.350		82.550	5.800
Zahtjev za pomoć u liječenju	336	240	77	19	96.750	-	89.300	7.450
Nabavka ortopedskog pomagala	4	3	1	0	1.558	-	1.318	240
Pomoć u nabavci udžbenika	402	387	15	0	48.750	-	48.750	-
Pomoć u stambenom zbrinjavanju (Kanton)	153	24	105	24	U rješavanju	25.000	189.500	U rješavanju
Zahtjev za odobrenje stipendija	135	130	5	0	136.400 u toku rješavanje za 2016./17.		85.250	51.150
Banjsko liječenje	126	38	77	11	-	-	-	-
Pomoć u snošenju troškova dženaze	68	48	6	14	33.624		33.624	-
Zahtjev za ličnu invalidninu	4	0	4	0	-	-	-	-
Samozapošljavanje i upošljavanje pripadnika boračkih populacija	31	24	7	0	148.200	-	79.200	-
Zahtjev za porodičnu invalidninu	71	65	5	1	-	-	-	-
Zdravstveno osiguranje	130	119	8	3	-	-	-	-
Ukupno	2.315	1.893	340	82	752.536	25.000	675.561	64,640

Općina je tokom 2016. godine imala saradnju sa boračkim udruženjima. Saradnja se odvijala u različitim područjima, od konkretne podrške boračkim populacijama do organizovanja različitih manifestacija i sadržaja u smislu obilježavanja značajnih datuma. Saradnja se može ocijeniti uspješnom.

PENZIONERI, SOCIJALNA ZAŠTITA

Koliko god općina nastojala da pomogne, rješenje problema sa kojima se susreće **5604 penzionera** (cca. 105 više od 2015 - podatak o isplaćenim penzijama za novembar 2016) sa područja općine, ne može ponuditi općina. Pensioneri sa prostora općine Tešanj čine **1,46%** populacije penzionera FBiH. Prisutno je 2662 korisnika starosnih penzija, 881 invalidskih i 1521 porodičnih penzija na prostoru općine Tešanj. Struktura prava po kojima su ostvarene penzije uglavnom je na nivou prosjeka FBiH (unutar 1,5%). Općina Tešanj u

trenutnim okolnostima ima među najpovoljnijim odnosima u BiH broj zaposlenih u odnosu na broj penzionera (**2,26 zaposleni na 1 penzionera**, ZDK cca 1,2, FBiH 1,1).

Općina je imala intenzivnu saradnju sa Udruženjem penzionera. Putem udruženja penzionerima je pomagano kod troškova ukopa i nekih drugih troškova (o tome se Vijeće informiše posebnim Informacijama). Sva planirana i ugovorena sredstva po ovom pitanju su transferirana. O raseljenim i problemima povratka, kao i socijalnoj zaštiti Općinsko vijeće se informiše kroz posebne dokumente/informacije.

DOMAĆE I MEĐUNARODNE INSTITUCIJE-SARADNJA SA DRUGIMA

Inicijative za izmjene zakona i zaštita prava na lokalnu samoupravu,

Općinski načelnik je tokom 2015 godine podnio nekoliko inicijativa usmjerenih na zaštitu interesa lokalne samouprave, i poboljšanje zakonodavstva koje reguliše određena pitanja od interesa za općinu Tešanj. Ustavni sud FBiH je sredinom 2016. godine presudio u korist Općine Tešanj, te donio odluku da se granski kolektivni ugovor ne primjenjuje na Općinu Tešanj. Ovo je važno zbog rizika od radno pravnih sporova po osnovu kolektivnih ugovora iz ranijeg perioda. Ranije pokrenuta inicijativa za izmjenu Zakona o javno-privatnom partnerstvu rezultirala je usvajanjem novog zakona u ZDK.

Općinski načelnik je tokom 2016. godine podnio Ustavnom sudu Federacije BiH zahtjev za zaštitu prava na lokalnu samoupravu i ocjenu ustavnosti Zakona o matičnim knjigama, Zakona o vatrogastvu FBiH i Zakona o vatrogastvu ZDK, te Zakon o inspekcijskim poslovima FBiH.

Osim toga pokrenuta je inicijativa za izmjenu navedenih zakona kod nadležnih organa ZDK i FBiH, a osim njih i Zakona o registraciji poslovnih subjekata u FBiH. Inicijativa za Zakon o registraciji poslovnih subjekata u FBiH poduzeta je kako bi se poslovni subjekti oslobodili plaćanja troškova u slučajevima kada općine i drugi nivoi vlasti svojim odlukama mijenjaju nazive ulica, naselja, adresnih brojeva i sl. Tada bi se to realizovalo po službenoj dužnosti.

Saradnja sa drugim općinama

Nastavljena je saradnja sa drugim općinama. Naročito je bila prisutna intenzivna saradnja sa susjednim općinama Doboj jug i Usora (zajednički uređaj za tretman otpadnih voda i dr.), te općinama Žepče i Teslić u području mikroregije pogodne za investiranje (projekat COBEAR). Sa susjednim općinama održan je niz različitih sastanaka Teslić, Doboj Jug, Usora, Žepče. Tokom 2016. godine općinu su posjetile predstavnici ili zvanične delegacije općina: Čelić, Novi Grad Sarajevo, Zenica, Lukavac, Kalesija i Bajrampaša (R. Turska), Šoštanj (R. Slovenija). Općina Tešanj donijela je odluku o uspostavi partnerskih odnosa sa općinom Šoštanj i zajedničkom saradnjom organizirana su dva Poslovna foruma na kojima su učestvovali privrednici i predstavnici komunalnih preduzeća sa područja općina Tešanj i Šoštanj. Cilj Forumu je razmjena iskustava dvije općine i upoznavanje privrednika radi uspostave dalje saradnje u budućnosti.

Ambasade i međunarodne organizacije

Općina Tešanj je u 2015 godini aktivno sarađivala sa predstavnicima ambasada akreditovanih u Bosni i Hercegovini i brojnim stranim i domaćim organizacijama. Ostvaren je kontakt sa slijedećim ambasadama u BiH: **Švedska, R. Austrija, SAD, Japan i Njemačka (deminiranje u vrijednosti 250.000 KM), Indonezija, Palestina, SAD, R. Turska...** Dio ostvarenih kontakata sa ambasadama rezultirao je i direktnijim kontaktima sa razvojnim agencijama, privrednim komorama i sl.

UNDP - Jačanje uloge mjesnih zajednica

Općina Tešanj je zajedno sa još 12 općina ispunila uslove i uzela učešće u Projektu "Jačanje uloge mjesnih zajednica (MZ) u Bosni i Hercegovini (BiH)" koji je zajednička inicijativa Vlada Švicarske i Švedske, čija je vrijednost 14,5 miliona KM a realizuje se putem UNDP." Veliki broj općina iz BiH je konkurisao, međutim izabrani su oni najbolji, među kojima i općina Tešanj. U sklopu istog je realizovano niz aktivnosti a izdvojio bih:

- Uređen je objekat za potrebe društvenog centra (MZ Dobropolje Mekiš) u koje je ukupno uloženo 11.500 KM sredstava UNDP i 2000 KM vlastitih sredstava (MZ i Općina);
- Nabavka opreme za potrebe Društvenog centra i MZ u Projektu ukupna dobit će biti **18.797,10 KM;**

- Potpisani su ugovori i započeta realizacija projekata MZ, ukupna vrijednost potpisanih ugovora iznosi 157.331.67 KM od čega su sredstva donatora (direktna dobit) 119.340 KM, po realizaciji projekata na raspolaganju ćemo imati još 11 136 KM;
- Potpisani ugovori o realizaciji projekata sa 3 UG za projekte u MZ Raduša, Jablanica i Tešanjka, za projekte ukupne vrijednosti 32.315,00 KM, dok će preostala 3 udruženja potpisati ugovore po ispunjenju dodatnih uslova u visini od 29.250 KM.

Nematerijalna dobit edukacija i unapređenje dobro educiranih kadrova u mjesnim zajednicama i udruženjima građana. Materijalna dobit Općine ugovorena i dijelom realizovana do kraja godine, implementirana - donirana putem UNDP BiH će iznositi **198.253,00 KM**. Za projekte koji se realiziraju općina je prihvatila obavezno sufinansiranje iz vlastitih sredstava, dakle na prethodno pomenuti iznos uključuju se i sredstva općine. Projekat se provodi minimalno još u 2017. godini u sličnom obimu aktivnosti i sredstava.

Projekat općinskog okolišnog i ekonomskog upravljanja (MEG) - je projekat u koji je uključena općina Tešanj. MEG Projekat je dio Programa saradnje Švicarske u BiH, u domenu Lokalne uprave i općinskih usluga, a realizira ga Razvojni program Ujedinjenih nacija u BiH (UNDP BiH), a implementira u 18 jedinica lokalne samouprave, među kojima je i Općina Tešanj. Cilj projekta je poboljšanje općinskog sistema upravljanja razvojem, te usluga u okolišnim i ekonomskim sektorima. Ukupan budžet za prvu fazu projekta iznosi približno 21 milion konvertibilnih maraka. Neke od projektnih aktivnosti su već u toku, a tokom januara treba da bude potpisan memorandum o saradnji. Očekuje se da će općina kroz ovaj projekat osim stručne i tehničke pomoći biti u prilici da ima na raspolaganju oko 600.000 KM donatorskih sredstava za vodovodnu i kanizacionu infrastrukturu.

Projekat zatvaranja kolektivnih centara i alternativnog smještaja putem osiguranja javnih stambenih rješenja na području Federacije Bosne i Hercegovine CEB 2 – projekat je koji se realizuje na nivou BiH. Općina Tešanj dio je ovog projekat. Izvjesno vrijeme je u pripremi realizacija ovog projekta, tako da su donesene potrebne odluke i izvršene različite pripreme. Općina je do sada ispunila sve obaveze koje je imala. U 2017. godini planirana je gradnja stambenog objekta sa 21 stambenom jedinicom, koje će se koristiti za socijalni stanovanje. Postoje još neke obaveze koje će općina Tešanj u tome realizovati, kao što je nadzor nad radovima, obezbjeđenje priključaka, uređenje lokaliteta, podrška u opremanju i sl. Projekcija ukupnih sredstava za 2017. godinu je **oko 950.000 KM**. U 2017. godini općina je pripremila lokaciju, platila projektovanje, pripremila potrebne dokumente i dr.

Drugo - Pored navedenog općina je sarađivala i sa drugim organizacijama; AHK, BIGMEV, IFC – dio Svjetske banke, USAID, Kult, Udruženje poslodavaca FBiH, Privredna komora FBiH, Mozaik i drugim.

REZIME

Postoji još mnogo stvari koje bi nekog mogle zanimati o radu Općinskog načelnika i organa uprave i mnogo informacija koje nisu mogli stati u izvještaj. Općinski načelnik kao organ lokalne vlasti dio je lokalne samouprave i u radu Općinskog načelnika (uostalom kao i Općinskog vijeća) uključen je organ uprave, brojne institucije, brojni pojedinci, komisije, timovi... Svi oni omogućili su provođenje u izvještaju opisanih aktivnosti. Ukupan pogled na rad u 2016. godini valja uzeti u kontekstu vremena i okolnosti, izazova i prilika koji su bili pred svima nama.

Općinski načelnik

Mr.sc. Suad Huskić,